

ბულალტრული აღრიცხვისა და აუდიტის საკანონმდებლო მოდერნიზება, ევროკავშირის მოთხოვნებისა და საქართველოს პრაქტიკის შესაბამისად

2015 წლის 27-29 აპრილს რუმინეთის დედაქალაქი ბუქარესტი მასპინძლობდა მსოფლიო ბანკის ორგანიზებითა და მსოფლიო ბანკის ფინანსური ანგარიშგების რეფორმის ცენტრის (CFRR) ხელმძღვანელობით ჩატარებულ საერთაშორისო კონფერენციას, რომლის თემა იყო „ბულალტრული აღრიცხვისა და აუდიტის საკანონმდებლო მოდერნიზება, ევროდირექტივების მოთხოვნებისა და საერთაშორისო პრაქტიკის შესაბამისად“. ღონისძიება ევროპისა და ცენტრალური აზიის რეგიონში ფინანსური ანგარიშგების რეფორმის მხარდაჭერას, საკანონმდებლო მარეგულირებელი ბაზის გაუმჯობესებას და ფინანსური ანგარიშგებისა და აუდიტის სფეროებში საუკეთესო საერთაშორისო პრაქტიკის დანერგვის ხელშეწყობას ითვალისწინებდა.

CFRR 2013 წლის 1 ოქტომბრიდან ახორციელებს 5-წლიან პროექტს – „აღმოსავლეთ პარტნიორობის ქვეყნებში აუდიტის და ანგარიშგების გაუმჯობესების პროგრამას“ (STAREP), რომლის ფარგლებშიც 2014 წლის 6-9 ოქტომბერს თბილისი მასპინძლობდა 2 საერთაშორისო კონფერენციას.

ბუქარესტის კონფერენციის მონაწილეებს შესაძლებლობა ჰქონდათ, გაცნობოდნენ ევროკავშირის პრაქტიკულ თვალთახედვას, ადგილობრივ კანონმდებლობაში ერთიანი ნორმატიული ბაზის ჩამოყალიბების შესახებ, ბულალტრული აღრიცხვისა და აუდიტის სფეროში.

ევროკავშირის აღმოსავლეთ პარტნიორობის ქვეყნებისათვის (სომხეთი, აზერბაიჯანი, ბელარუსი, საქართველო, მოლდოვა, უკრაინა) გამოცდილების გაზიარების მიზნით, კონფერენციაზე თავიანთ ქვეყნებში რეგულირების არსებული პრაქტიკის პრეზენტაცია წარმოადგინეს გერმანიის, რუმინეთის, თურქეთის ფინანსთა სამინისტროებისა და ამ ქვეყნების სხვა სახელმწიფო მარეგულირებელი სტრუქტურების, აგრეთვე პროფესიული ორგანიზაციების წარმომადგენლებმა.

მიმდინარე ეტაპზე, როდესაც „ევროკავშირისა და ევროპის ატომური ენერჯის გაერთიანებასა და მათ წევრ სახელმწიფოებთან საქართველოს თანამშრომლობის შესახებ ასოცირების ხელშეკრულებით“ საქართველოს აღებული აქვს ვალდებულება, აღრიცხვისა და აუდიტის მარეგულირებელი საკანონმდებლო ბაზა მიუსადაგოს შესაბამის ევროდირექტივებს, მნიშვნელოვანია, რომ კონფერენციაზე მიწვეული იყვნენ საქართველოს სახელმწიფო სტრუქტურების, მარეგულირებელი ორგანოებისა და პროფესიული ორგანიზაციების წარმომადგენლები, კერძოდ კონფერენციაში მონაწილეობდნენ:

- საქართველოს პარლამენტის საფინანსო-საბიუჯეტო კომიტეტის თავმჯდომარე – თამაზ მეჭიაური;
- საქართველოს ფინანსთა მინისტრის მოადგილე, შემოსავლების სამსახურის უფროსი – გიორგი თაბუაშვილი;
- შემოსავლების სამსახურის უფროსის მრჩეველი – იური დოლიძე;
- მსოფლიო ბანკის საქართველოს ოფისის წარმომადგენლები – გალინა ალაგერდოვა და ირინა გორდელაძე;
- საქართველოს ეროვნული ბანკიდან – სალომე სხირტლაძე;
- საქართველოს პროფესიონალ ბულალტერთა და აუდიტორთა ფედერაციიდან – ზურაბ ლალაზაშვილი და ლავრენტი ჭუმბურიძე;
- აუდიტორთა, ბულალტერთა და ფინანსურ მენეჯერთა ფედერაციიდან – იური პაპასქუა.